



Inatsisartunut ilaasortaq
Aqqaluaq B. Egede, Inuit Ataqatigiit

**Akuersaangilluinnarnissaq aamma Kuannersuarni suliassaq pillugit § 37
naapertorlugu apeqquteqaammut nr. 2018-246-imut akissut**

01-10-2018
Suliaq nr. 2018-19040

Postboks 930
3900 Nuuk
Tlf. (+299) 34 68 00
E-mail:
asn@nanoq.gl
www.govmin.gl

Inatsisartut Suleriaasianni § 37 naapertorlugu akuersaangilluinnarnissaq aamma Kuannersuarni suliassaq pillugit apeqqutit matuma kingulianiittut saqqummiuppatit. Kalaallisoortaa aamma danskisoortaa assigiinngissuteqarpassipput, taamaattumik akissuteqaammi kalaallisoortaa isummersorfigineqarpoq. Akissuteqaatip matuma suliarineqarneranut atatillugu Pinnortitamut Avatangiisinullu Naalakkersuisoqarfimmit akissuteqaammut ilassutissanik piniartoqarpoq.

**1. Naalakkersuisut ammaffigaat aatsitassat qinngorneqarpallaat
pineqartillugit 0- tolerancep atuuteqqilernissaa?**

Akissut:

Aatsitassanik qinngornernik ulorianartunik akulinnik misissuinnermut piaanermullu atatillugu, akuersaangilluinnarniarluni tunuarsimaaruteqarneq Inatsisartuni ulloq 24. oktober 2013 suliarinninnermi atorunnaarsineqarpoq. Aatsitassarsiorluni misissuinissamut akuersissummik nutaamik tunniussinermi aatsitassanik qinngornernik ulorianartunik akulinnik aatsitassarsiorluni misissuinissamut pisinnaatitaaffiliisoqassanersoq, Naalakkersuisut ataasiakkaatigut isummertarput. Naalakkersuisut tamatuma saniatigut naliusunut killissaliussat qaffasinnerpaaffissaannut, tamatumunnga atatillugu atuuttussaasinnaasunut, aalajangersimasumik aalajangiussaqaangillat.

**2. Illoqarfinni inoqarfinnilu qanippallaamik, tassa, 6 km-terinik
qanissusilimmi aatsitassanik peqqissutsimik akornutaasinnaasunik
akulinnik ingerlatsisoqaanginnissaa Naalakkersuisut
qulakkeersinnaavaat?**

Akissut:

Piaanissamik qinnuteqaammi suliassami sunniinissat tamarmik paasinarsinneqartussaapput, ilanngullugu peqqissutsimut navianartorsiorfitsinnaasut. Qinnuteqaammut najoqqutassat oqartussanit attuumassuteqartunit sukumiisumik misissorneqartussaapput aammalu Naalakkersuisut tamanna tunngavigalugu piaanissamut akuersissummik imalimmik nalunaaruteqartoqassanersoq aalajangiisussaallutik.

3. Uran-imik pīaaffiginiarneqartoq pillugu Naalakkersuisut akuersilersaarpat?

Akissut:

Naalakkersuisut pīaanissaq pillugu qinnuteqaammut ataasiakkaatigut isummissapput, qinnuteqaat tiguneqarpat.

4. Ilumoorpa Naalakkersuisut Kuannersuarni aatsitassarsiorfissamik ammaassinissaq siunertaralugu suliamik ingerlatsisut?

Akissut:

§ 37 naapertorlugu apeqquteqaammi 2018-229-imi apeqqummut nr. 1-imut akissuteqaat innersuussutigaa.

5. Innuttaasut illuinnaasiunngitsumik uran pillugu paasissutissinneqarnissaat Naalakkersuisut qulakkeerniarpaat?

Akissut:

Innuttasut mineraalit qinngornernik ulorianartunik akulinnik pīaanermi sunniutaasinnaasut pillugit sapinngisamik paasissutissanik tunngaveqartumik paasissutissinneqarnissaat Naalakkersuisut kissaatigaat. Kuannersuarni suliamut atatillugu qinnuteqaammut najoqqutassat minnerpaamik sapaatit akunnerini 8-imi tamanut ammasumik tusarniaassutigineqassapput. Tusarniaanerup taassuma ingerlanerani Namminersorlutik Oqartussanit, ingerlatseqatigiiffimmit, Namminersorlutik Oqartussat siunnersortaannit avataaneersunit kiisalu ilisimatuunit arlaannaannulluunniit attuumassuteqanngitsunit peqataaffigineqartumik tamanut ammasumik ataatsimiititsisoqartassaaq.

2014-imi aamma 2015-imi illoqarfinni nunaqarfinnilu, Kuannersuarni suliamut atassuteqarsinnaasuni, urani pillugu paasissutissiilluni ataatsimiinnernik ingerlatsisoqarpoq. Ataatsimiinnerni taakkunani ilisimatuut misillitagaqartut suleqatigiit arlaannaannulluunniit attuumassuteqanngitsut peqataapput, aammalu politikerinik peqataasoqarani. Aatsitassanut Aqutsisoqarfik kattuffinnik suliamut attuumassutilinnik 3. Maj 2017-imi ataatsimeeqateqarpoq, Narsamilu 30. August 2017-imi innuttaasunut paasissutissiissutaasumik ataatsimiisitsiluni.

Aatsitassanut inatsimmi, §95-imi takuneqarsinnaavoq, innuttaasut, illoqarfiimiut kattuffiillu attuumassuteqartut Kalaallit Nunaanniittut misissuinissanut siunnersorneqarnissanullu atatillugu, tassani aatsitassarsionernut maanna ingerlanneqartunut atatillugu, ajornartorsiutaasinnaasut qulaajarnissaannut aningaasaliiffigitinnissamut qinnuteqarsinnaanerat.

6. Naalakkersuisut isumaat malillugu aamma ilisimatuussutsikkut misissuisut sulinerminni suut Kuannersuarni pīaanissami mianersornartutut nalilersinnaavaat?

Akissut:

Kuannersuarni suliassaq pillugu piaanissaq pillugu qinnuteqaat aatsitassanut
oqartussamit kiisalu taassuma siunnersortaannit avataaneersunit
sukumiisumik misissorneqassaaq. Naalakkersuisut qinnuteqaammik
tamakkiisumik suli tigusaqanngillat.

Inussiarnersumik inuulluaqqusillunga


Vittus Qujaukitsog